

AKASHVANI AIZAWL

REGIONAL NEWS BULLETIN

HEADLINES (EVENING)

- Tun thla July atanga Territorial Army a tang tur te lakluh tura ruahman chu chhan hrang hrang vangin kumin November thlaah sawn a ni.
- Kumin kum chanve chhungin Mizoramah ruihhlo vangin mi 33 an thi tawh a, heroin leh a kaihhnawih avanga thi an tam ber.
- Axiom-4 mission-a International Space Station ah ni 18 an cham hnuin Indian Astronaut Group Captain Shubhanshu Shukla leh a thawhpui mi pathumte vawiin chawhnu khan tluang takin lei ah an lo let.
- External Affairs Minister Dr.S.Jaishankar chuan vawiin khan Beijing-ah China President Xi Jinping a kawm

<><><>

TERRITORIAL ARMY

Mizorama Territorial Army din tura hmalakna kal zelah tun thla July thla atanga Territorial Army a tang tur te lakluh tura ruahman chu chhan hrang hrang vangin kumin November thlaah sawn a ni.

Akashvani News Aizawl zawhna chhangin, Coordination & Land Search Committee, Chairman, Lt. Col. Clement Lalhmingthanga, MLA chuan ruahman lawk ang chuan Territorial Army a tang tur lakluhna hi June ni 14 atanga tan tur ni mah se, ruahsur nasa leh harsatna dangte avangin July thlaah sawn a ni a, hei pawh hi khawchhia leh thil dang vangte in November thla khian sawn leh a ni a ti.

Tun dinhmunah Lunglei leh Aizawl-ah Indian Army officer pakhat ve ve kaihhruaina hnuaiah company pahnih an in bun tawh a, Aizawl a mi chu Assam Rifles hmun hluiah an awm lailawk mek a, hetihlai hian Bungbangla Tourist Lodge building-ah an awm lailawkna tur ruahman sak an ni tih sawiin, PWD leh PHE tiamin Mizoram sorkar department hrang hrang te chu a tul anga thawm tha turin Coordination & Land Search Committee chuan an hriattir tawh a, an tihfel hunah an

insawn thla ang a ti a, Lunglei lama mite pawh Assam Rifles hmunah an awm mek tih a sawi a ni.

Lt. Col. Clement-a chuan Territorial Army a tang turte chu ruahman ang chuan November thlaah pilot project angin Mizo hlang 70 lak phawt an ni ang a, a lehpekah a leta tam an la leh dawn a ti a, TA a tang turte lakluh ni tur chiang taka ruat a nih veleh form lakchhuah hun leh thu pawimawh te advertisement a tihchhuah a ni chauh dawn tih a sawi a ni.

Pu Clement Lalhmingthanga sawi danin, Mizo Territorial Army awmna tur hian thutlukna siam a la ni lova, kumin chhung chuan thutlukna siam hman an tum a ni. Mizorama Territorial Army bul tan nan hian Company pahnih a awm dawn a, company pakhat-ah officer pakhat leh Junior Commissioned Officer, JCO pali, bakah Other range-92, an vaiin mi 102 an awm dawn a, officer dil hun chhung chu June thla khan a tawp tawh a, Mizo tan bik ni lovin ram pum huapa dil theih a ni a, officer 19, hmeichhe pakhat leh mipa 18 lak an ni dawn a ni.

<><><>

MUHCS

Mizoram Universal Health Care Scheme (MUHCS) hnuaiah mi 16,519 an inziak lut tawh a, inziaklut zingah hian mi 14,460 te chu General (Rs 2500) hnuaia in ziaklut niin, mi 1338 chu Standard (Rs 5000) hnuaia ziah luh an ni a, Private (Rs 10,000) hnuaiah mi 721 an inziak lut tawh bawk a ni.

Sawrkar chhinchhiah danin, MUHCS hnuaiah hian offline-in 15933 leh online-in 586, an vaiin mi 16519 inziak lut tawh a, MUHCS inziah luh hi kalpui chhunzawm zel niin thla thar August atanga inziak lut duh tan a man let khata tam chawi in a inziah luh theih dawn a, General plan Rs 2500 ni thin chu Rs 5000 ni tawhin Standard (Rs 5000) chu Rs 10000 a ni tawh dawn a, Premium (Rs 10,000) pawh Rs 20,000 a ni tawh dawn a ni.

MUHCS hnuaiah hian Mizorama sorkar damdawi in leh Primary Health Centre (PHC) zawng zawng te an awm bakah, Mizoram chhunga private damdawiin 11, Mizoram chhunga Day Care Centre (Dialysis) 3 leh Mizoram pawna damdawi in 25 te empanelled an ni tawh a ni.

Hetihlai hian, Private damdawiin he scheme zawm duh lo te leh sorkar inbiakna neih a la ni lo a ni.

<><><>

DRUG RELATED DEATH

Kumin kum chanve chhungin Mizoramah ruihhlo vangin mi 33 an thi tawh a, heroin leh a kaihhnawih avanga thi an tam ber.

Excise & Narcotics Department in a chhinchhiah danin, kumin January thla atanga tun thla July ni 2 thleng khan Mizoramah ruihhlo avangin mi 33 an thi tawh a, heng zinga mi 28 chu mipa niin, midang 5 chu hmeichhia an ni a, ruihhlo vanga thi te hi

thalai kum 19 atanga kum 44 inkar an ni a, an zinga mi 9 te chu Heroin vanga thi an ni a, midang 24 te chu heroin leh ruihhlo dang tihpawlh vanga thi an ni thung a ni.

Heroin leh Proxyvon bakah hian Alprazolam, Cataspa, Corazepam, khuh damdawi tui chi Cough Syrup, Dendrite, Diazepam, Ganja, Nitrosun, Pacitane (pepe), Parvon Spas, Peptica, Respira D, zu, codeine leh damdawi mum dang te an thihpui a ni.

Kan corr report lo ngaithla ang.

Excise & Narcotics Department in Mizorama ruihhlo vanga thi a chhinchhiah tan kum 1984 atanga kumin thlengin Mizoramah ruihhlo vangin mi 1912 an thi tawh a, a zinga mi 1681 te chu mipa niin, 231 te chu hmeichhia an ni a, ruihhlo vanga thi tawh zingah kum 14 mi chu a naupang ber a, kum 58 chu a upa ber thung a ni.

Kum 2004 kha Mizorama ruihhlo vanga thi an tam ber tum niin mi 143, mipa 122 leh hmeichhia 21 an thi a, khatih hunlai khan Proxyvon chu an thihpui tam ber a ni a, kum 2015 chho atangin ruihhlo vanga thi zingah Heroin vanga thi an tam tan a. Kum 2005 hnulamah kum 2023 kha ruihhlo vanga thi an tam leh ber tum niin, mi 76 in ruihhlo vangin nunna an chan a ni.

<><><>

LADC CEM

Ni ruk chhung Delhi a Sorkar laipui dawra zin Lai Autonomous District Council a Chief Executive Member, Pu N.Zangura leh amah tawiawmute chuan Sorkar laipui hotu hrang hrang dawrin, LADC tana hmasawнна nasa zawk a awmtheih nan hma laksak turin an ngen.

New Delhi a an cham chhungin Pu N. Zangura chuan 16th Finance Commission Chairman Dr. Arvind Panagariya leh Dr. Manoj Panda, 16th Finance Commission Member leh Official thenkhatte hmuin, LADC hmasawнна atana ruahmanna an thehluhte tihhlawhtlinsak turin a ngen a, 16th Finance Commission Chairman chuan an mipuiten hmalam an pan a duh vanga Delhi thlenga thiltul a bawhzui chu fakawm a tithu CEM hi hrilhin, Project an thehluh-te chu a pawimawhdan indawt thlangchhuakin thehlut tha turin thurawn a lo pe.

LADC CEM chuan Minister of State for Fisheries, Animal Husbandry and Dairying and Minority Affairs Pu George Kurian pawh hmu in LADC mamawh hrang hrang te a thlen a, Union Minister chuan Fisheries hnuaiah LADC in project , cheng Nuai 377 senna tur a hnena thehluh tawh chu hmalak anih tur thu, CEM hi a lo hrilh a. Minority Minister anih ang in harsatna leh mamawh an neihte a hnena thlen thin turin a chah.

LADC a CEM Pu N.Zangura hi Pu BN Thangpuia, MDC leh Pu Joseph Lalhmingthanga Chinzah, Sr. Audit Officer, LADC ten an tawiawm a ni.

Lalnggheta Ralte Lawngtlai PTC

<><><>

SAMVIDHAN HATYA DIWAS

India ram danpui palzut ni champhaphak, Samvidhaan Hatya Diwas pualin vawiin khan Siaha ah leh Hnahthial District ah Exhibition buatsaih a ni.

Sawrkhar laipui Ministry of Culture in June Ni 25 chu Samvidhan Hatya Diwas (Ram danpui palzut ni) atana a lo puan tawh behchhanin District pahnihah hian hun hman a ni a, Siaha District ah chuan hmun 4 ah exihibition neih tura ruahman niin July ni 11 khan DRDO conferenc Hall ah exhibition buatsaih alo ni tawh a, Vawiinah BDO office Complex ah hun hman niin July ni 18 hian Art and Culture Department, MADC in a buatsaih veleh anga, a tawpna ber hi Tipa ah neih tura ruahman a ni.

Vawiina Exhibition ah hian India ram zalenna sualtute sulhnu thenkhat bakah Kum 1975 National emergency puan a nih lai chanchin te phochhuah a ni a, heng bakah hian Democracy Rama Danpui (Constitution) pawimawhna video tawi phochhuah nghal a ni. Zirlai naupangte bakah mipui tam takin he exhibition hi chhimin signature board a tar ah an hming an ziak theuh bawk a ni.

Hnahthial ah chuan DC Conference Hall-ah Bawrhsap, Pi K.Vanlalruati hova hun hman a ni a, Bawrhsap chuan kum 1975-a National Emergency puan a nih champha hriat reng nan mai mi lovin Indian Danpui hman sual a nih dan leh hman sual a nih tawh loh nana mipuite kan inralrin reng theihna tur atana he hun hi buatsaih a nih thu a tarlang a. Mipuite, a bikin mi retheite zalenna leh dikna chanvo rah behna rapthlak tak thlengin India ram in zalenna a neih hnu a hun thim ber, tih hiala sawi a lo ni ta a ni" tiin he hun hman a tul chhan a sawi a ni.

Samvidhan Hatya Diwas hi Kum 1975 June ni 25 ah India ram Prime Minister Pi Indira Gandhi in Article 352 hnuaia Emergency a puan champha hriatrengna puala hun hman a ni a, kumin hi a kum 50-na cham a nih angin Sawrkhar laipui chuan hetiangamang tur hian ruahmanna siamin mipuite dikna chanvo inzirtirhar lehna leh Democracy ram tana Danpui (Constitution) a pawimawh thu inzirtirna hun puala buatsaih a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



Axiom-4 mission-a International Space Station ah ni 18 an cham hnuin Indian Astronaut Group Captain Shubhanshu Shukla leh a thawhpui mi pathumte vawiin chawhnu khan tluang takin lei ah an lo let. Shubhanshu Sukla te hi US-a Pacific tuifinriat kam California-a San Diego-ah an lo tum a ni.

Prime Minister Narendra Modia chuan dam taka astronaut Shubhanshu Shukla alo let leh thei chu lawmawm a tih thu sawiin ramchhung mipuite nen hlim takin an lo hmuak tih a sawi a. India mi zinga International Space Station tlawh hmasa ber anihna chuan mi tam tak a ti phurin beiseina a siam sak ngei dawn tih a sawi a ni.

(Newsonair)

<><><>

EA M

External Affairs Minister Dr.S.Jaishankar chuan vawiin khan Beijing-ah China President Xi Jinping a kawm a. He hunah hain Shanghai Cooperation Organisation (SCO) membrete pawh an tel. Dr.Jaishankara chuan Chinese President hi India leh China inlaichinna kawnga hmasawinna hrang hrangte a hrilhfiah a. President Droupadi Murmu leh Prime Minister Narendra Modia te aiawhin chibai a buk nghal a ni.

Dr.Jaishankar hian nimin khan Beijing a thleng a. SCO Foreign Minister inhmukkhawm Tianjin khawpuia neih turah a tel dawn a. Nimin vek khan China Foreign Minister Wang Yi nen Beijing ah an inkawm bawk a ni.

He hunah hian China lam atanga hydrological data tihchhuah chhunzawm theih a duh thu a sawi a. Eibar zawinna kawngah harsatna awm leh inkhuahkhirhna thenkhat tihtawp a tul thu a sawi a ni. Hei bakah hian External Affairs minister chuan ramria remna leh muanna avanga thil tha tam tak lo thleng te a tarlang bawk a ni.

<><><>

SKILL INDIA

Vawiin khan Skill India Mission kum 10 tlinna lawm a ni. He mission hi kum 2015 khan Prime minister Narendra Modia chuan a hawng a. Thil siamchhuah kawngah thalaite thiamna pek leh eizawna leh khawsakna kawnga thiamthil zirtir chu he mission hian a tum ber a ni.

<><><>